

KUTULAMA YA BADIAKRE



Mpe, ya kele, ntete ya kele kutula badiakre na dibuundu. Mpe mwa dibuundu ya beto awa kele na kimpwanza. Ya ke na denomination mosi ve to kima mosi samu na kutinda badiakre ya yawu, ya ke soolaka badiakre ya yawu mosi. Ya ke soolaka pasteur ya yawu, ya ke soolaka ba-administrateur ya yawu, ya ke soolaka bima nionso yina ke kotaka mpe ke basika na dibuundu. Ata muntu mosi ve kele na ndinga na zulu ya kima mosi, ya kele dibuundu. Mpe dibuundu kele bayina ke kwisaka mpe ke sadisaka dibuundu na mvwandulu ya bawu, na mosi ya kumi ya bawu mpe makabu ya bawu, ya kele ntangu nionso bawu yina kele na muswa ya kieleka samu na kutula bima yayi.

² Mpe mu zola vutula matondo na conseil ya badiakre yina me luta, mpe mu ke tuba yawu awa na nkumbu ya dibuundu nionso. Kana mosi ya bampangi yina kele awa, ya kele Mpangi Cox, Mpangi Fleeman, mpe Mpangi Higginbotham mpe Mpangi Deitzman, ba me sadila beto kisalu ya mbote, ba me sadila Mfumu, na tabernacle yayi.

³ Mpe na ntangu mosi mpe yankaka, landila misiku ya dibuundu, konso mvula, badiakre to ba-administrateur ke kumaka kaka na nsuka ya kisalu ya bawu. Mpe kana bawu zola vutuka, mbote mingi. Kana bawu zola vutuka ve, na yina ba lendaka tula bantu na bisika ya bawu, ti conseil yayi me yambula kisalu ya bawu.

⁴ Mpe na nkokila yina mu bokilaka conseil ya ba-administrateur, yina kele na conseil ya malu-malu ya ba-administrateur. Mu me mona Mpangi Luther McDowell awa na nkokila yayi, beto ke na kiese na kumona yandi, yina vwandaka na ntangu me luta na conseil ya ba-administrateur. Mu kwendaka na sabala yayi samu na kubaka bansangu samu na kutala mpe kufwokula na fotokopi, yina ba ke talisa na dibuundu, mpe. Ti ba-administrateur ya dibuundu ntangu yayi kele Mpangi William Morgan, Mpangi Mike Egan, mpe Mpangi Banks Wood, mpe Mpangi Roy Roberson. Mpe bawu nionso kele ya mbanza yayi, kana Mpangi Roberson yina ke zingaka na kati-kati ya bambanza zole. Mfumu me mona ya kulunga bantu yayi na kati ya kisalu yina, mpe ba me vwanda bantu ya lukumu, mpe bawu me kuzwa ntangu yayi kisalu mutindu ba-administrateur ya dibuundu yayi.

⁵ Mpe na yina lukutakanu yayi vwandaka landila, mpe ba me tuba na munu na pasteur ya kilandi ti beto, kusoola conseil ya malu-malu ya badiakre, ti bayayi me kuma na nsuka ya kisalu ya bawu mpe—mpe ba me yambula kisalu, na yina ba fwana kusoola badiakre yankaka. Ntangu yayi, dibuundu. . . Mutindu yayi kele

ya kusala, kele, conseil lenda soola badiakre, bantu yina ba me solula na bawu mpe ba me mona ti bawu kele bantu ya lukumu mpe ya kusungama.

⁶ Kisalu ya diakre kele kisalu ya nene mingi, mpe ya kele lukumu ya nene na ntuala ya Mfumu na kuvwanda diakre na dibuundu. Mpe na yina, na lukutakanu na nkokila yina, ba soolaka munu mwa babakala kuna. Mpe ntangu mu vwandaka na lukutakanu na pasteur, yina landaka . . . na Kilumbu ya tanu yina me luta, bakala yayi ndimaka ti babakala yayi vwandaka babakala ya lukumu mpe ya kusungama.

⁷ Bakala mosi ya ntwenia yina ba monaka, vwandaka ya kulunga ve (ve samu yandi vwandaka ve bakala ya kikalulu ya mbote), mosi ya babakala ya beto ya lukumu ya conseil ya ba-administrateur pesaka nkumbu ya yandi. Kasi mutindu pasteur na munu vwandaka na lukutakanu, mpe mu yufulaka bamvula ya mwana-bakala yayi ya ntwenia, yandi vwandaka na bamvula ya yandi ya ntete ya makumi zole. Bakala ya lukumu, ya kusungama, mpe ya kieleka, kasi beto monaka ti yandi vwandaka ya kukwela ve. Biblia ke lomba ti diakre kuvwanda bakala ya kukwela. Yandi fwana vwanda bakala yina kele na kento mosi.

⁸ Mpe na yina bakala yankaka yina vwandaka muntu mosi ya lukumu mingi, na makuki ya kulunga samu na kisalu mpe zolaka vwanda bakala ya kieleka, mpangi mosi ya bakala pesaka nkumbu ya yandi. Na yina na manima ya kutala mbote diambu yango, ti mpangi-bakala me kwisa ntama mingi ve na Lukwikilu yayi, kento ya yandi ke kwikilaka ve na Yawu. Na yina ya me katula makuki na bakala yayi na kuvwanda na kisalu. Samu yandi fwana vwanda na dibuta ya yandi nionso na nsi ya lutumu, bawu fwana vwanda diaka na kati ya Lukwikilu, samu yawu ke vwanda na kubendana.

⁹ Mpe beto ke na kutunga kima mosi ntangu yayi, mpe beto ke zola kutula dibuundu yayi. Mpe mutindu surveillant général ya dibuundu, mu fwana mona ti ya kele ya kulunga, landila Masonuku, bima nyonso kele ya kulunga na Ndinga.

¹⁰ Mpe na yina, kuna, ya me vwanda mbote samu na conseil mpe pasteur, mpe surveillant, samu na kusoola na kati ya kimvuka ya bantu yayi awa babakala yina beto ke banza kele ya lukumu mpe bantu ya kusungama. Beto lenda kaka kutalisa bawu. Mpe ya kele, na manima, ba me soola bawu na dibuundu, na nzila ya voti ya bawu. Mpe na manima bantu yayi ke sala bisalu yayi, kana bawu ke kuwa ti bawu me ndima kisalu yayi. Na yina bawu ke kwiza samu na mwa ntangu fioti, samu na kutala kana bawu me kuwa ti ya kieleka Nzambi me bokila bawu. Mpe kana na manima, kana bawu banza ti bawu kele ya kulunga ve, na yina, bawu kele na muswa na mwa basabala ke

kwisa na kuyambula kisalu, ti ba lendaka tula muntu yankaka na kisika ya bawu.

¹¹ Na yina, na mbandukulu ya reveil yina (kana Nzambi zola) mu zola sala awa na tabernacle yayi ntangu mu ke pema, na yina mu—na yina mu. . . beto ke tuma badiakre yayi na kutentikaka maboko na zulu ya bawu, badiakre mpe trésorier na dibuundu yayi. Kasi ntete ba fwana kusoola bawu mpe—mpe kumona wapi mutindu bawu ke zolaka yawu mpe mutindu dibuundu ke zolaka yawu. Na yina kana ya kele—na yina kana ya kele ya kulunga na balweka nyonso zole, na yina beto ke bieka babakala yayi badiacre, kaka mutindu mosi beto ke soola ba-Administrateur.

¹² Ya kele kimpwanza mpe musiku ya dibuundu, na nzila ya Ndinga ya Nzambi. Na yina, ti, bawu lenda kaka ve kutuba ti “Mu banza ti muntu yayi ke vwanda muntu ya kieleka,” ya kele mutindu yina ve, “Mpangi Neville ke banza ti muntu yayi ke vwanda bakala ya kieleka,” to “conseil ya ba-administrateur ke banza ti bakala yayi ke vwanda bakala ya kieleka.” Ya fwana vwanda na nzila ya dibuundu! Muntu ve ke salaka kima mosi na kati ya yandi awa. Ya kele voti ya dibuundu. Ya kele kimpwanza ya dibuundu.

¹³ Masonuku ya ntama bebaka na kufuluka ya masa na mvula 1937. Beto me fwokula yawu, mpe beto ke namika yawu na kibaka awa ntama mingi ve, bisalu ya ba-administrateur, badiakre, ba-trésorier, mpe nionso yina, pasteur, bilandi, mpe nionso yina.

¹⁴ Na lemvo ya Nzambi, ba me tuba na munu, mpe nkama mosi na zulu ya nkama mosi me vote na nzila ya conseil ya dibuundu yayi, ti ba me ndima ti Mpangi Hollin Hickerson kele bakala ya kusungama, ya lukumu, mpe yandi me lunga ti ba tula yandi na kisika samu na kuzwa lukumu ya nene ya kuvwanda diakre ya tabernacle yayi.

¹⁵ Diaka, beto me mona, mpe na nzila ya voti ya conseil, ti Mpangi Collins ke monana muntu ya lukumu mpe ya kusungama. Na kuvwandaka longi, yandi mosi, na yina beto ke lomba yandi na kukwisa mpe kuvwanda diakre ya dibuundu; mpe kaka diakre ve, kasi kilandi ya Mpangi Neville, mpe mu banza samu na kalasi ya lukolo ya Lumingu, to samu na kubaka kisika ya Mpangi Neville, to nionso yina ba ke bokila yandi samu na kuvwanda kilandi ya Mpangi Neville. Ya kele Mpangi Collins.

¹⁶ Mpe, dyaka, dibuundu me mona ti, na luvalu, ti Mpangi Tony Zabel, kele bakala ya lukumu mpe bakala ya kusungama, mpe conseil ya ba-administrateur mpe ba-pasteur me ndima yandi, samu na kulomba yandi na kundima kisalu ya diakre na tabernacle yayi.

¹⁷ Mpe ba me lomba diaka, mpe ba me mona bakala mosi ya lukumu na kati ya beto. . . (Ve. . . bantu yayi kele ve bantu ya lukumu bawu mosi, ntangu yayi, kasi ba me soola bawu kaka na

nzila ya conseil.) Mpangi Taylor ya Henryville, to Memphis, mu ke kwikila ya kele, ya Memphis, na Indiana. Yandi ke vwandaka na beto kubanda ntama, na kusalaka kosalu ya huissier mpe nionso yina ya lendaka vwanda. Ti dibuundu me ndima yandi, to conseil mpe ba-pasteur, ti yandi zola kundima kosalu ya nene mutindu kuvwanda diakre ya tabernacle yayi.

¹⁸ Mpe ba me yufula yawu diaka bokila ya bakala ya Mpangi Mike Egan, Mpangi—Mpangi Bob Harned, ba me soola yandi na nzila ya conseil mpe na nzila ya ba-pasteur, samu na kundima kosalu ya trésorier ya tabernacle yayi, yina kele kosalu ya lukumu, mpe ya ke lomba ludedomo mpe lukumu.

¹⁹ Na kusalaka yayi, mu banza, bampangi ya munu, na yina ba me soola beno awa, ti ya ke vwanda lukumu ya nene samu na beno. Mpe yina kaka ve, kasi kima mosi ya kusala.

²⁰ Na ntangu yayi mu ke lomba na Mpangi Neville, kilandi ya beto, samu na kutanga yina ba me lomba na diakre. Mpangi Neville, kana nge lenda tanga yawu na Ndinga ya Nzambi. [Mpangi Neville ke na kutangaka ya Ntete ya Timothée kapu 3:8-13—Mu.]

[Ba-diakre mpe fwana kuvwanda bantu ya buzitu, mpe ya bukieleka, bawu fwana kunwa ve malafu mingi to kusosa ve na kuzwa mbongo na mayuya;]

[Na yina bawu fwana kuvwanda ya kukwikama na lukwikilu ya kieleka ata kuvwanda na diambu ya yimbi na kati ya bantima ya bawu.]

[Ba fwana ntete kutala nkadulu ya bawu; na manima kana diambu ya kusemba bawu kele ve, bawu lenda kusala mutindu ba-diakre.]

[Bakento mpe fwana kuvwanda na buzitu mpe kutonga ve bampangi, bawu fwana vwanda na nkadulu ya kufwanana, mpe bantu ya kukwikama na mambu nionso.]

[Badiakre fwana kukwela kaka kento mosi, bawu fwana kulenda na kutwadisa bana ya bawu mpe bayinzo ya bawu mosi.]

[Badiakre yina ke salaka mbote kosalu ya bawu ke kuzwaka nkembo, mpe bawu lenda kuzonzila na kivuvu ya nene lukwikilu yina kele na Klisto Yesu.]

²¹ Amen. Mu ke zola na ntangu yayi kuyufula bampangi yayi ba me bokila, kana bawu lenda kwisa kaka na ntwala awa na estrade kaka mwa ntangu fyoti. Mpe na yina beto ke kulumusa bayintu ya beto na mwa ntangu fioti samu na bisambu, mu zola bawu . . . Mpe dibuundu me zaba yinki yayi kele, ya kele kusoola conseil ya ba-diakre ya beno mpe trésorier ya beno.

²² Mfumu Yesu, ya ke na mabanza ya ludedomo, ya busantu ti beto ke kwisa na Nge ntangu yayi. Beto ke kwiza na buzitu ya

Ndinga ya Nge ya Kulutila Santu, beto ke kwisa mpe ke kwikila ti “Bika ti konso ndinga ya muntu kuvwanda luvunu, kasi ya Nzambi kuvwanda ya kieleka.” Mpe beto ke vutula matondo na Nge samu na Dibuundu yayi yina Yesu me sumba na Menga ya Yandi Mosi ya ntalu, mpe me pesa beto yinzo yayi samu na kusambila.

²³ Mpe mutindu ba-surveillant ya dikabu yayi ya nene, yina Mpeve-Santu me tuma beto na kuvwanda, beto ke na kumeka ntangu yayi na kutalisa na dibuundu yayi nkonga ya bantu ya kukwikama, ya mbote yina beto ke kwikilaka kele ya kufuluka na Mpeve mpe ya kukubama samu na kisalu. Mutindu ba tubaka mbala mosi samu na conseil ya badiakre, “Beno kwenda soola na kati ya beno, bantu ya kimbangi ya mbote mpe ya kufuluka na Mpeve-Santu, samu ti bawu kusala kisalu ya mutindu yayi, samu na kukeba mifwidi ya bakento mpe bansona, samu na kukabula mbongo, mpe samu na kukeba mbote dibuundu.” Bamvula mingi me luta, beto me tanga bisono ya bakala yayi ya nene, yina twadisamaka na kimpeve, yina vwandaka santu Paul, yina salaka nsamunu samu na yina Masonuku ke lomba samu na bisalu ya mutindu yayi.

²⁴ Nzambi, pesa lukumu na bantu yayi. Mpe ntangu yayi ya kele nsodolo, Mfumu, mutindu dibuundu ya kimpwanza, mutindu nzutu ya Mfumu Yesu, ti bawu ke sala nsodolo. Mpe. . . [Kisika ya mpamba na bande—Mu.] . . . mpe ke twadisa kitini yayi ya kisalu na mutindu ya luswaswanu, na Nkumbu ya mbote mpe ya santu ya Yesu.

²⁵ Ntangu yayi na bayintu ya beto ya kukulumusa, bayintu ya beto kaka ve kasi bantima ya beto, mpe mutindu bamambe nionso ya dibuundu yayi, yina ke kwisaka awa ntangu nionso mpe ke simbisaka yawu na mosi ya kumi ya beno mpe makabu ya beno, yina kele mambele ya dibuundu yayi, na yina pasteur mpe munu, kaka, ke tala, pasteur ya kilandi, Mpangi Neville, mpe munu ke tala, mu zola yufula kana dibuundu yayi me mona ti Mpangi Taylor kele bakala ya kusungama mpe ya kulunga, na nzila ya mabanza ya beno ya mbote, samu na kuvwanda diakre na kimvuka ya bantu yayi? Beno ke sala kidimbu mutindu mosi na kutelemisaka diboko ya beno. [Mpangi Branham me vwanda swi—Mu.] Mbote mingi. Ntangu yayi kana ya kele na kima ya kuswaswana, beno zola kutelemisa diboko ya beno. [Mpangi Branham me vwanda swi.] Matondo na beno.

²⁶ Ya ke na bamambele ya dibuundu yayi awa yina me mona . . . mpe beno nionso, beno me mona ti Mpangi Hollin Hickerson kele bakala ya kusungama mpe ya lukumu, mpe bakala yina beno me mona na meso ya beno ti yandi kele ya kulunga samu na kukuma diakre ya dibuundu yayi? Beno lenda sala kidimbu na kutelemisaka diboko ya beno ya kibakala. [Mpangi Branham me vwanda swi—Mu.] Kana ya kele na diambu ya kuswaswana,

na yina beno telemisa diboko ya beno. [Mpangi Branham me vwanda swi.]

²⁷ Dibuundu yayi me mona ti Mpangi Collins kele mutindu mosi, bakala ya kusungama mpe bakala ya lukumu, mpe ya kulunga samu na kosalu ya diakre na dibuundu yayi? Beno zola telemisa diboko ya beno. [Mpangi Branham me vwanda swi—Mu.] Mbote mingi. Kana ya kele na kima ya kuswaswana, beno zola telemisa diboko ya beno. [Mpangi Branham me vwanda swi.]

²⁸ dibuundu yayi me mona ti Mpangi Tony Zabel kele bakala ya lukumu mpe ya kulunga samu na kosalu yayi, ya kuvwanda diakre na zulu ya dikabu ya dibuundu yayi? Beno zola telemisa diboko ya beno ya kibakala. [Mpangi Branham me vwanda swi—Mu.] Kana ya kele na kima ya kuswaswana, beno zola telemisa diboko ya beno. [Mpangi Branham me vwanda swi.]

²⁹ Dibuundu yayi me mona ti Mpangi Harned kele bakala ya mbote mpe ya kusungama, yina me vwanda na beto mwa bantangu, samu na kuvwanda trésorier, secrétaire-trésorier ya dibuundu yayi, samu na kubumba mbongo mpe kufuta ba-facture? Kana ya kele mutindu yina, beno telemisa diboko ya beno ya kibakala. [Mpangi Branham me vwanda swi—Mu.] Ya kele na mosi ya kuswaswana, beno telemisa diboko ya beno ya kibakala. [Mpangi Branham me vwanda swi.]

³⁰ Mu zola tuba na bampangi yina me telega awa na ntangu yayi, na dikulu ya kulunsi yayi, ti dibuundu yayi, na nkama mosi na zulu ya nkama (ata luswaswanu ve), me mona beno nionso kele ya kulunga na ntwala ya Nzambi samu na kosalu yayi yina Nzambi me bokila beno.

³¹ Ntangu yayi, beno, mutindu ba me tuba, “Bika ti bayayi ntete kuvwanda ya kumeka, mpe kutala kana bawu zola kosalu yayi.” Na kati ya mwa basabala, kana Nzambi kuzola, mu ke vutuka samu na kutentika maboko na zulu ya nkonga ya bantu yayi, samu na kutula bawu na kisika pwelele mutindu ba-administra-. . . to badiakre ya dibuundu yayi, mpe trésorier.

Beto kulumusa bayintu ya beto na mwa ntangu fioti:

³² Mfumu, beto ke na kiese na nkokila yayi ti kele na bantu ke zinga na zulu ya ntodo yina lenda tambula na busantu na ntwala ya yinza; na busantu mingi ti tabernacle yayi, na misiku ya ngolo mutindu yayi kele na yawu, lenda vote babakala tanu na kisika mutindu bantwadisi ya bawu, kukondwa voti mosi ya kuswaswana. Beto ke na kiese samu na bawu, mpe beto ke tala ti Nge vwandaka na beto na balukanu yayi, conseil mpe beto ba-pasteur.

³³ Nzambi, sakumuna bantu yayi. Mpe bika bawu sala kosalu yayi na ntima ya bawu ya muvimba, na kuzabaka ti ya kele na lukumu ya nene na Zulu. Kilumbu mosi ntangu Babuku ya Mazulu ke vwanda ya kukanga, bika ti Buku ya bantu ya mazulu

mpe na Buku ya nene ya Mazulu kuzibuka, bika ti bankumbu ya bawu kuvwanda nkama mosi na zulu ya nkama na ntwala ya Nzambi mpe Mvulusi mpe basoda nyonso ya Mazulu, samu na kuvwanda mutindu mosi na Kimfumu ya Yandi. Sakumuna bawu, Mfumu, mpe bika ti bawu sala kisalu yayi mbote. Na Nkumbu ya Yesu beto ke tonda Nge samu na bawu. Amen.

³⁴ Mu zola kaka kupesa beno mbote, Mpangi Harned, mpe Mpangi Zabel, mpe Mpangi Collins, Mpangi Hickerson, mpe Mpangi Taylor. Kiese mingi na kuzaba ti beto ke na kubundanaka ntangu nyonso yayi na bantu ya lukumu ya mutindu yayi. Nzambi sakumuna beno ntangu yayi. Mpe beto ke mona beno na ntangu ke kwisa, na ntangu mu ke pema fioti, ntangu mu ke vutuka, mpe kutala wapi mutindu beno ke zolaka kisalu ya beno. Mbote mingi, na nzila ya voti ya bawu, mu banza ti ya vwandaka na nkama mosi na zulu ya nkama, ata luswaswanu mosi ve.

³⁵ Oh, beno ke na kiese ve ti beno ke vukanaka na bantu bubu yayi yina lenda zinga na ntwala ya Nzambi, na busantu, mpe kuzinga na ntwala ya yinza yayi na mutindu yina? Ya kele kima ya mbote.

³⁶ Mpe mu ke na kiese mingi na kuzaba na nkokila yayi ti mu ke na bweso ya—ya kuzwa bantu yayi mpe dibuundu yayi na kuvwanda bankundi ya munu. Mu ke na kiese ti Nzambi me bika ti mu vukana munu mosi na Dibuundu ya Yandi na yinza ya muvimba. Oh, ba ke vweza bawu mpe ke manga bawu mpe ba ke tubila bawu, mpe mutindu mu vwandaka tuba na suka yayi na nsangu ya munu, ya lendaka bawu kele bantu yina ke balukaka na poto-poto, mutindu yinza ke talaka bawu, mutindu “nkonga ya bafanatiki,” kasi Nzambi ke talaka bawu mutindu bana ya Yandi. Mu ke na kiese mingi samu na yawu. Bawu fwana ve kutuba na beno ba kilometres yikwa yawu ke vwanda na ngonda. Bawu lenda vwanda na kiyeka ya kutuba na beno mambu nionso ya mwini mpe wapi mutindu yawu ke salaka. Kasi ya kele na kima mosi bawu me zaba, bawu zaba ngunga yina ba me butuka mbala zole. Mu kele na kyese mingi samu na bawu.

³⁷ Mpe mutindu mwa kingana yina mu longokaka, mpe mu ke vukisa yawu na bana ya munu zole ya bakento na nkokila yayi samu ti ya vwanda pwelele samu na beto, samu na kusala yawu kieleka samu na beto, ti beno ke bakula yina ya zola kutuba. Na suka mosi, mu vumbukaka na mbeto . . . Mu ke na bana-bakento zole ya fioti. Mosi ya bawu kele Rebekah, mpe mosi ya bawu kele Sarah, mpe bawu kele mwa bana ya bakento ya papa.

³⁸ Mpe mu kele na mwana ya fioti ya bakala, Joseph. Mu katukaka na Chattanooga, na nkokila mosi na manima ya lukutakanu, mu vwandaka kuna na lukutakanu ya munu ya nsuka. Mpe mu vwandaka na kati ya ditoma, mu vwandaka na mwana ya munu ya bakala ya ntete, Billy. Kento ya yandi mpe

Meda vwandaka na kati ya ditoma, mpe bana ya bakento. Mpe mutindu beto vwandaka tambula na kitamina ya banzila mingi, muntu mosi ve vwandaka tuba kima mosi. Mpe na nkokila yina mu tubaka mambu ya ngolo mingi na bantu samu na nsalulu ya bawu. Mpe muntu ve tubaka kima mosi. Mpe Joseph ya fioti kwisaka mpe simbaka munu na dipeka, yandi tubaka, “Papa, ya kieleka nge me longa na nkokila yayi!”

³⁹ Mpe na suka yayi, na kukwendaka diaka na Bala-bala ya Nana mpe ya Kumi, . . . to ya Penn mpe ya Kumi, mu zola tuba, muntu mosi ve tubaka kima, kento ya munu na bana zole ya bakento. Mpe Joseph ya fioti simbaka munu diaka na dipeka, yandi tubaka, “Papa, yayi, mu zolaka mingi dilongi ya suka yayi,” yandi tubaka.

Mu tubaka, “Mbote, mu me kuzwa muntu mosi me sepela na munu, ya kele mwana ya munu ya bakala.”

⁴⁰ Mpe beto vutuka na mwa kima ya beto ya fioti yina beto vwandaka tuba. Kuna na suka mosi, mu vwandaka na kati ya kivinga, Becky ya fioti basikaka mpe tubaka, yandi tubaka, yandi vwandaka na nkata ya dikulu ya munu mpe tulaka diboko ya yandi na nziunga ya munu, mpe yandi kele mwana-kento ya fioti ya papa. Mpe yandi vwandaka kanga munu na maboko ya yandi. Mpe Sarah ya fioti dumukaka na mbeto na mwa pijama ya yandi mpe zolaka, tuba, na kukwisaka mbangu. Yandi kele mwana ya munu ya fioti ya meso ya mpembe.

⁴¹ Becky ya leke tubaka, “Oh, Sarah, ya ke na nsatu ve samu na nge kukwisa, samu mu me baka Papa ya muvimba munu mosi. Papa kele nionso ya munu mosi!” Mpe mwa Sara ya fioti, me balula mwa bikoba ya yandi, mwa meso ya yandi ya mpembe kumaka mpimpa. Mu salaka kidimbu mutindu *yayi* mpe mu talisaka yandi dibolongo yankaka, mpe yandi kwisaka mpe vwandaka na kutulaka dibolongo na kati-kati.

⁴² Becky kele na makulu ya yinda, na yina ya vwandaka simba ntoto. Sarah ya leke vwandaka tekita, na yina mu tulaka maboko nionso zole pene-pene ya Sarah. Sarah ya fioti talaka kuna na Becky mpe yandi tubaka, “Becky, nge lenda baka Papa ya muvimba, kasi Papa me baka munu ya muvimba!”

⁴³ Mpe mu banza ti ya kele mutindu yina awa. Beto lenda zaba ve théologie nyonso mpe bampova nyonso ya nene ya Grec, nkonga yayi ya bantu fwana zaba ve. Kasi ya ke na kima mosi ya kieleka, mu ke kwikila ti Yesu me kuzwa muvimba ya *beto*. Amen.

Mbote mingi, Mpangi Neville.



KUTULAMA YA BADIAKRE KNG58-0720E
(The Placing Of Deacons)

BANDANDANI YA NDIATULU, NTUMUNU MPE MALONGI YA DIBUUNDU

Nsangu yayi ya Mpangi William Marrion Branham, kulongamaka na Kingelesi, na Lumingu na nkokila, na kilumbu ya 20 ya Ngonda ya sambwadi, na mvula 1958, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org